

四庫全書

史部

欽定四庫全書

吳興備志卷九

明 董斯張 撰

人物徵第五之二

沈曇慶懷文從父兄也父發員外散騎侍郎曇慶仕宋位尚書左丞時歲有水旱曇慶議立常平倉以救人急文帝納其言而事不行大明元年為徐州刺史時殿中員外將軍裴景仁助戍彭城景仁本北人多悉關中事使撰秦紀十卷叙苻氏事其書傳於世曇慶謹實清正所

蒞有稱績嘗謂子弟曰吾處世無才能圖作大老子耳
世以長者稱之終祠部尚書

南齊書

沈儼之字士恭徐州刺史曇慶子亦不仕永明元年
徵中書郎

沈文季字仲達文叔弟也以寬雅正直見知尤善博及
彈碁在宋封山陽縣五等伯位中書郎父慶之遇害諸
子見收文叔謂之曰我能死爾能報遂自殺文季揮刀
馳馬去收者不敢追遂免明帝立為黃門郎沈攸之起

義齊高帝加文季冠軍將軍督吳興錢唐軍事改封西豐縣侯文季風采稜岸善於進止歷尚書右僕射王晏嘗戲文季為吳興僕射文季答曰瑯琊執法似不出卿門建武二年魏軍南伐明帝以為憂制文季鎮壽春文季入城嚴加脩守魏軍尋退百姓無所損後東昏屢行殺戮尚書令徐孝嗣深懷憂慮欲與文季論時事文季輒引以他辭終不得及文季以時方昏亂託老疾不預朝機兄子昭畧謂文季曰阿父年六十為員外僕射欲求免

乎文季笑而不答未幾見害先被召便知敗舉動如常
登車顧曰此行恐往而不反於華林省死朝埜寃之中
興元年贈司空諡曰忠憲公

世祖在東宮於玄圃宴會朝臣文季數舉酒勸褚淵
淵甚不平啓世祖曰沈文季謂淵經為其郡數加淵
酒文季曰惟桑與梓必恭敬止豈如明府亡國失土
不識枌榆遂言及兵事淵曰陳顯達沈文季當今將
畧足委以邊事文季諱稱將門因是發怒啓世祖曰

褚淵自謂是忠臣未知身死之日何面目見宋明帝
世祖笑曰沈率醉也中丞劉休舉其事見原後豫章
王北宅後堂集會文季與淵並善琵琶酒闌淵取樂
器為明君曲文季便下席大唱曰沈文季不能作妓
兒

沈麟士父虔之宋樂安令麟士幼而俊敏年七歲聽叔
父岳言玄賓散言無所遺失岳撫其背曰若斯文不絕
其在爾乎及長有高尚之志作玄散賦太守孔山士

辟不應宗人徐州刺史曇慶侍中懷文左率勃來候之
未嘗答也會稽孔源休輩皆從學焉年過八十耳目猶
聰明家故被火災乃手抄故所燬亡書成二三千卷滿
數十篋人以為養身靜默之所致也卒年八十五遺令
祭奠惟清水一盂子孫奉而行之上

沈憲字彥璋演之從祖弟子也憲少有幹局為駕部郎
宋明帝與憲甚謂曰卿廣州刺史材也補烏程令甚著
政績太守褚彥回嘆以為方圓可施以吏能累遷少府

暫卧主書單景雋啓依旨斃之徽孚堅執曰事須當更審爾子恪徒跣奔至建陽門上聞驚覺曰故當未賜諸侯命耶徽孚以答上撫床曰遙光幾誤朕事及

見子恪顧問流涕諸侯悉賜供饌

子恪傳

沈瑀字伯瑜武康人父昶事宋建平王景素景素謀反昶先去之後繫獄瑀詣臺陳請得免罪由是知名為奉朝請初瑀在竟陵王家素與范雲善齊末嘗就雲宿夢坐屋梁柱上仰見天中有字曰范氏宅至是瑀謂帝說

之帝曰雲得不死此夢可驗及帝即位雲深薦瑀自暨陽令擢兼尚書右丞瑀薦族人沈僧隆僧照並有吏幹帝並納之歷尋陽太守為信成蕭穎達長史瑀性倔強每忤穎達穎達銜之天監八年因入諮事辭又激厲穎達作色曰朝廷用君作行事耶瑀出謂人曰吾死而後已終不能側傾面從是日於路為人所殺多以為穎達害焉子續累訟之遇穎達尋卒事不窮究續乃布衣蔬食

終其身

梁書

沈瑀為建德令教民一丁種桑十五株柿四株及梨

栗女丁半之頃之成林矣

合璧事類

沈瑀為揚州部從事時建康令沈徽字恃勢傲瑀瑀

以法繩之衆憚其強

沈瑀傳

沈約字休文性不飲酒雖遇隆重而居處儉素立宅東

田矚望郊阜嘗為郊居賦以序其事左目重瞳子腰有

紫誌聰明過人好墳籍聚書至二萬卷京師莫比少時

孤貧丐於宗黨得米數百斛為宗人所侮覆米而去及

貴不以為憾

裴子野祖松之宋元嘉中受詔續修何承天宋史未成而卒子野嘗欲繼承先業及齊永明末沈約所撰宋書稱松之已後無聞焉子野更撰為宋史畧二十篇云戮淮南太守沈璞以其不從義師故也約懼徒跣往謝之請兩釋焉約削宋史子野亦削宋畧

南史
參楊

休玠八

代談數

沈顛字處默齊永明中徵拜著作郎太子舍人通直郎

並不起梁天監四年太舉北侵南陽樂藏為武康令以
顛從役到建業揚州別駕陸任以書與吳興太守柳惲
責其不能甄善別賢惲大慙即表薦之所著文章數十
篇

沈峻字士嵩武康人家世農夫至峻好學與舅太史叔
明師事宗人沈麟士在門下積年晝夜自課睡則以杖
自擊其篤志如此遂博通五經尤長三禮為國子助教
兼五經博士於館講授聽者常數百人及中書舍人賀

琛奉勅撰梁官乃啓峻全補西省學士助撰錄書成入
兼中書舍人出為武康令

邛遲字希範靈鞠子八歲便屬文靈鞠常謂氣質似我
梁武帝平建業引為驃騎主簿甚被禮遇時勸進梁王
及殊禮皆遲文也及踐阼遷中書郎待詔文德殿時帝
著連珠詔羣臣繼作者數十人遲文最美坐事免乃獻
責躬詩上優辭答之後出為永嘉太守在郡不稱職為
有司所糾帝愛其才寢其奏天監四年臨川王宏北侵

魏以為諮議參軍領記室時陳伯子在北與魏軍來拒
遲以書喻之伯子遂降

邨仲孚字公信靈鞠從孫少好學讀書常以中宵鐘鳴
為限靈鞠嘗稱為千里駒齊永明初為國子生王儉曰
東南之美復見邨生舉高第未調還鄉里家貧乃結羣
盜為之計劫掠三吳仲孚聰明有智畧羣盜畏服所行
皆果故亦不發復為衛尉卿領大匠累遷豫章內史在

罷更厲清節頃之卒贈黃門侍郎

梁書

吳興邛師施以廉潔稱罷臨安縣還惟有二十籠簿書
並是倉庫券帖當事比以范述曾位至臺郎

南史

沈崇儵字思整懷明子也太守柳惲辟為主簿崇儵從
惲到郡還迎其母母卒崇儵以不及侍疾將欲致死水
漿不入口晝夜號哭旬日殆將氣絕兄弟謂之曰殯葬
未申遽自毀滅非全孝之道也崇儵之瘞所不避雨雪
倚坟哀慟每夜恒有猛獸來望之有聲如嘆息者家貧
無以遷窆乃行乞經年始獲塋焉郡縣舉其至孝經年

為永寧令自以祿不及養怛恨愈甚至縣卒時年三十

九梁

書

沈旋字士規襲爵建昌侯位司徒右長史以母憂去官
因疏食辟穀服除猶絕粳梁諡曰恭旋弟趨字孝鯉亦
知名位黃門郎旋子實嗣侯實弟衆

沈衆字仲興好學有文詞任梁累遷太子中允侯景之
亂表求還吳興召募故義部曲以討賊梁武許之及景
圍臺城衆率宗黨及義附五千餘人入援軍容甚敝正景

深憚之梁武於城內遥授太子右衛率臺城陷乃降景
景平元帝以為司徒左長史魏克江陵見掠尋亦逃歸
陳武帝受命歷中書令起部尚書衆性狷急歷詆公卿
非毀朝政帝怒因其休暇還武康於吳中賜死

吳均欲撰齊書求借齊起居注及羣臣行狀武帝不許
遂私撰奏之稱帝為齊明帝佐命帝惡其書實錄使中
書舍人劉之遴詰問數十條竟支離無對勅付省焚之

免職上

按此均史筆不讓南董舊志何沒沒耶

沈浚字叔源侯景之亂避難來歸吳興太守張嵒往見之謂曰賊臣憑陵人臣効命之日今欲收集兵刃保據貴鄉雖復萬死誠亦無恨浚因勸嵒起義時邵陵王綸東奔至錢唐聞之遣前舍人陸邛公板授嵒征東將軍嵒曰天子蒙塵今日何情復受榮號留板而已侯景乃遣其中軍侯子鑒擊嵒嵒敗死之

南史

沈炯字初明祖瑀潯陽太守父續王府記室叅軍侯景

之亂宋子仙據吳興使召炯委以書記炯固辭子仙怒命斬之或救之僅而獲免及子仙敗王僧辨構得之羽檄書皆出於炯武帝南下與僧辨登壇設盟炯為其文及景東奔至吳獲炯妻虞及子行簡並殺之景平元帝愍炯爵原鄉侯魏克荊州炯被禽尋來歸歷司農卿御史中丞入陳位明威將軍諡恭子

陳書

江陵平梁御史中丞沈炯遷長安太祖授儀同三司甚禮待之炯恐太祖愛其人才恒閉門却掃無所交

遊時有文章隨即毀棄不令流布嘗獨行經漢武通天臺為表奏之陳己思歸之意奏訖其夜炯夢見宮禁之所兵衛甚嚴炯便以情事陳訴聞有人言甚不惜放卿幾日可至若一日內見出關此恐不復由我寤而異之當時以為恍惚十餘日便有命放還遂與

王充等東歸

三國
典畧

章昭達字伯通武康人祖道蓋齊廣平太守父法尚揚州議曹從事侯景之亂昭達悉募鄉人入援臺城後歷

建大功官至開府儀同三司初陳世祖嘗夢昭達升於
臺鉉及旦以夢告之至是侍宴世祖顧昭達曰卿憶夢
否何以償吾昭達對曰當竭犬馬之用以盡臣節自餘

無以奉償

陳書

湘州刺史華皎叛奉蕭歸為主士馬甚盛岳陽太守
章昭裕等並隸於皎高宗遣徐度討之皎敗奔江陵
皎黨詣軍請降俘獲萬餘人皎黨並誅惟任蠻奴章
昭裕等獲免昭裕昭達之弟也

上

沈君理字仲倫吳興人祖僧叟父巡君理美風儀博學
有識鑒陳武帝鎮南徐州巡遣君理致謁命尚會稽長
公主帝受禪拜駙馬都尉封永安亭侯為吳郡太守時
兵革未寧百姓荒散君理總集士卒修飾器械深以幹
理見稱大建中歷吏部尚書宣帝以君理女為皇太子

妃賜爵望蔡亭侯位侍中右僕射諡貞憲

陳書

君理子遵儉早卒以弟君高子遵禮為後

沈邁君理叔方正有幹局歷散騎常侍

南史

沈君高字季高君理弟廣州刺史嶺南俚獠世相攻
殺君高本文吏無武幹推心撫御甚得民和諡曰祁
子

沈君公君理弟自梁元帝敗後常在江陵禎江中與
蕭瓛蕭岩叛隋歸陳後主擢為太子詹事君公博學
有才辨善談論後主深器之陳亡入隋文帝以其叛
亡命斬於建康

上

沈洙字弘道少方雅好學不妄交游通三禮春秋左氏

傳精識強記仕梁為祠部尚書郎侯景之亂洙竄於臨
安時文帝在馬親就習業及武帝入輔除國子博士與
沈文阿同掌儀禮武帝受禪加員外散騎常侍歷大匠

卿

陳書

徐整吳興人梁直閣將軍慈源侯整生綜陳始安太守
綜生方貴隋延州臨真令方貴生唐采州刺史孝德即

齊暉之父也

張九齡徐文公碑

沈文阿字國衛峻子也性剛強有膂力少習父業研精

章句紹泰元年入為國子博士尋領步兵校尉兼掌儀禮自太清之亂臺閣故事無有在者文阿父峻梁武時嘗掌朝儀頗有遺稿乃斟酌裁撰禮度皆自出之及陳武帝受禪文阿輒棄官還武康帝大怒發使徃誅之時文阿宗人沈恪為郡請使者寬其死即面縛鎖致於上前上視而笑之曰腐儒復何為者遂赦之

陳書

貞觀十四年詔以沈重沈文阿等前代名儒學徒多

行其義命求其後

舊唐書

沈恪字子恭深沉有幹局侯景圍臺城起東西二土山以逼城城內亦作土山應之恪為東土山主晝夜拒戰以功封東興侯入陳歷特進金紫光祿大夫諡曰光子法深嗣

按德清有東主山沈恪以拒侯景功封侯即家焉東主二字本陳書

文皇后兄沈欽武康人父法深梁安前中錄事參軍贈光祿大夫建成侯欽襲封位尚書左僕射素無伎能奉

己而已謚曰成子觀嗣頗有學識歷御史中丞

隋高祖開皇九年以陳都官尚書孔範御史中丞沈觀等邪佞於其主以致滅亡北投邊裔

沈不害字孝和舉明經天嘉初除嘉德殿學士自梁季喪亂至是國學未立不害上書詔嘉答之又表改定樂章詔使製三朝樂歌八首合二十八曲行之樂府太建中轉員外散騎常侍光祿卿尋為戎昭將軍武陵王長史行吳興郡事俄入為尚書左丞不害通經術善屬文

雖博綜墳典而家無卷軸每製文椽筆立成曾無尋檢
周弘正嘗稱之曰沈生可謂意聖人乎子志道字崇基
少知名位安東新蔡王記室叅軍

沈重字德厚武康人弱歲而孤居喪合禮及長專心儒
學從師不遠千里遂博覽羣書尤明詩禮及左氏春秋
大同二年除五經博士梁元帝之在藩也甚嘆異之及
即位遣主史何武迎重西上及江陵平重乃留事梁主
蕭詧為中書侍郎累遷廷尉卿詧又令重於合歡亭講

周禮周高祖以重經明行修遣上士柳裘至梁徵之天
和中於紫極殿講三教義樞機明辨咸為諸儒所推

後周

書

沈君游吳興人祖君叟父廵君游博學有詞采仕蕭歸
位至散騎常侍有文集十卷

後周書

姚僧垣字法衛吳興武康人吳太常信八世孫曾祖郢
宋員外散騎常侍五城侯父菩提梁高平令嘗嬰疾歷
年乃留心醫藥梁武帝心又好之每召菩提討論方術

言多會意由是頗禮之太清元年轉湘東王記室參軍
僧垣少好文史不留意於章句時商畧今古則為學者
所稱及侯景圍建業僧垣乃棄妻子赴難武帝嘉之授
戎昭將軍湘東王府記室參軍及宮城陷百官逃散僧
垣假道歸至吳興謁郡守張嶷嶷見僧垣流涕曰吾過
荷朝恩今報之死君是此邦大族又朝廷舊臣今日得
君吾事辦矣俄而景兵大至攻戰累日郡城遂陷僧垣
竄避久之乃被拘執景將侯子鑒素聞其名深相器遇

因此獲免及簡文嗣位僧垣還建業以本官兼中書舍
人元帝平侯景召僧垣赴荊州改授晉王府諮議其時
雖平大亂而任用匪才朝廷混雜無復綱紀僧垣每深
憂之謂故人曰吾觀此禍敗不久今時上策莫若近關
聞者皆竊笑及周克荊州僧垣猶侍元帝不離左右為
軍人所止方涕泣而去有梁後畧十卷行於世

後周書

按僧垣棄妻子赴建業之難及荊州陷猶侍元帝真
義士也李延壽以僧垣入藝術郡志因之不著其大

節何耶

吳興章華字仲宗家本農夫至華獨好學與士君子游處頗通經史善屬文侯景之亂遊嶺南居羅浮山寺專精習業歐陽頎為廣州刺史署為南海太守頎子紇敗乃還都後主時除大市令非其所好乃辭以病禎明初上書極諫書奏後主怒即日斬之

陳書章華已載典故此特詳之

姚察字伯審六歲誦書萬餘言十二能屬文年十三梁簡文時在東宮引於宣猷堂聽講論語任陳歷度支吏

部尚書入隋大為文帝所重帝謂侍臣曰平陳之後惟
得此人封北絳郡公煬帝即位拜太子內舍人

南史

察自居顯要一不交通常有門生不敢厚餉送南布
一端花練一匹察謂曰吾所衣者止是麻布蒲練此
物於吾無用既欲相欵接幸不煩爾此人遜謝察厲
色驅出自是莫敢餽遺

沈光字總持吳興人也父君道仕陳吏部侍郎陳滅家
於長安皇太子勇引署學士光少驍捷善戲馬為天下

之最畧綜書記微有詞藻嘗慕立功名不拘小節家甚
貧寡父兄並以傭書為事光獨跣跣交通輕俠為京師
惡少年之所比附人多贍遺得以養親每致甘食美服
未嘗困匱煬帝以為折衝即將賞遇優重帝每解衣推
食以賜之同輩莫與為此光自以荷恩深重思懷竭節
及江都之難潛構義勇將為帝復仇先是帝寵昵宮奴
名為給使宇文化及以光驍勇方任之令其總統營於
禁內時麥孟才錢傑等陰圖化及謂光曰吾等荷國厚

恩不能死難以衛社稷斯則古人之所恥也今又俛首
事仇受其驅率有靦面目何用生為必欲殺之死無所
恨公義士也肯從吾乎光泣下沾襟曰是所望於將軍
也僕領給使數百人並荷先帝恩遇今在化及內營以
此復仇如膺鷗之逐鳥雀萬世之功在此一舉願將軍
勉之孟才為將軍領江淮之衆數千人期以營將發時
晨起襲化及光語洩陳謙告其事化及大懼曰此麥鐵
杖子也及沈光者並勇決不可當須避其鋒是夜即與

腹心走出營外留人告司馬德戡等遣領兵馬逮捕孟才光聞營內喧聲知事發不及披甲即襲化及營空無所獲值舍人元敏數而斬之遇德戡兵入四面圍合光大呼潰圍給使齊奮斬首數十級賊皆披靡德戡輒復遣騎持弓翼而射之光身無介冑遂為所害麾下數百人皆鬪而死一無降者壯士聞之莫不為之隕涕

隋書

光載郡志不詳故全錄

沈法興恪子也隋季起兵發自東陽將趨江都下餘杭


郡北至烏程精兵六萬毘陵通守路道德拒之法興請
與和因襲殺道德據有江表十餘郡後聞越王侗立乃
上表自稱大司馬錄尚書事天門公承制置百官頗依
陳氏故事是時杜伏威據歷陽陳稜據江都李子通據
海陵法興三面受敵軍數挫陳稜尋為李子通所圍送
質求救法興使其子綸帥兵救之子通率衆攻綸大敗
乘勝濟江陷其江口法興使蔣元超拒之于慶亭元超
戰死法興左右數百人投吳郡賊帥聞人遂安遣其將

葉孝辯迎之法興至中路而悔欲殺孝辯更向會稽孝

辯覺之法興懼赴江死

舊唐書

按楊廣弑父賊也大業之末民生塗炭羣雄並起使
法興好謀而成安知江左不太原乎要其人與錢鳳
沈充不倫矣



吳興備志卷九

欽定四庫全書

史部

吳興備志卷十一

詳校官編修_臣曹振鏞

檢討_臣德生覆勘

覆校官主事_臣龔敬身

校對官主簿_臣汪日贊

謄錄貢生_臣李玉璣

謄錄舉人_臣張光熙

欽定四庫全書

吳興脩志卷十

明 董斯張 撰

人物徵第五之三

唐施世瑛字玉華勇斷有才隋末天下大亂乃糾宗族及鄉里子弟聚糧自守聞唐高祖起率衆從之高祖賜金鐘一口錦五段勅書褒之拜為柳州刺史

安吉志

武德三年李子通攻陷武康四年七月以安吉人施世瑛使持節督諸軍事安州刺史征子通未行其年

八月子通平施世瑛改杭州刺史

餘杭志

武德四年二月戊午王世充鄭州司兵沈悅遣使詣左
武侯大將李世勣請降左衛將軍王君廓夜引兵襲虎
牢悅為內應遂拔之獲其荊王行本及長史戴胄悅君

理孫也

資治通鑑

姚思廉字簡之父察思廉少受漢史其父能傳家業勤
學寡慾未嘗言及家人產入隋為代王侑侍讀會義師
克京城府寮奔駭惟思廉侍王不離其側兵將昇殿思

廉厲聲曰唐公舉義本匡王室卿等不宜無禮於王高
祖聞而義之貞觀初遷弘文學士列於十八學士圖令
文學褚亮為之贊曰志苦辛勤紀言實錄臨危殉義餘
風勵俗又受詔書與魏徵同撰梁陳二史其編次筆削
皆思廉功也太宗將幸九成宮思廉切諫太宗嘉之賜
帛歷散騎常侍賜爵豐城縣男諡曰康子處平官至通
事舍人處平子瑋舊唐書

家有閻博陵畫唐秦府十八學士各有真贊亦唐人

書多與舊史不同姚東字思廉舊史姚思廉字簡之

避暑
錄

姚濤字令璋武后世以直諫稱歷文昌左丞同平章事
諡曰成

姚班濤弟也舉明經累封宣城郡公班嘗與濤數年間
俱為定州刺史戶部尚書時人榮之班嘗以其曾祖察
所撰漢書訓纂多為後之注漢書者隱沒名氏將為已
說班乃撰漢書昭訓四十卷以發明舊義上

班當作珽

陝郡姚氏出自武康梁有征東將軍吳興郡公宣業宣業生安仁隋汾州刺史安仁生祥隋懷州刺史祥生懿

雋州都督元之即懿子也

唐宰相世系表

張按元之自吳興入關不過五世自隋至武后不過百年吳興名賢元之當採入

姚崇本名元崇字元之武后時以字行後避開元號更今名武后朝歷任夏官尚書張柬之等迎中宗復辟崇

預謀先天二年以兵部尚書同中書門下三品時承武
韋瀆政之後紀綱大壞宰相至十七人臺省要職乃至
無限數宗先有司罷冗職修法而紀官任百必各當其
官責成於下而權歸於上又吏事明敏朝機政務邊屯
士馬皆默綜時決剖割不滯帝倚崇以大政而盧懷慎
清謹得並相崇嘗疾謁告十餘日政事委積懷慎不能
決入惶恐謝帝莞然曰朕以天下事付姚宗獨藉卿坐
鎮雅俗耳宗既出須臾裁決立盡後病瘧請告帝遣使

為長城縣子

張九齡徐文公碑

徐嶠字巨山堅子也開元中為駕部員外郎集賢院學士遷中書舍人內供奉外河南尹封慈源縣公父子相次為學士自祖及孫三世為中書舍人

談志

開元二十四年徐嶠為大理少卿

德宗敦崇外族贈沈太后父吳興沈易直太師易直子庫部員外郎介福贈太傅介福子德州刺史士衡贈太保易直第二子秘書少監震贈太尉時沈氏封贈拜爵

者百餘人貞元七年詔外曾祖隋陝令沈琳贈司徒追封徐國公與外祖贈太師易直等立五廟后無近屬惟族子房為近德宗用為金吾將軍

新唐書

沈震德清人御史中丞麟士二十葉孫沈恪太廟齋郎

麟士十九葉孫

顏真卿吳興沈氏祖德碑

顏真卿為平原太守兼防禦使以前侍御史沈震為

判官

魯公行狀

按此沈震豈即贈太尉者耶

沈懷文吳興人舉孝廉為休寧主簿丁母憂三年廬墓側手植松栢二千株每一號慟衆鳥為之哀鳴翔集墓木山中舊多虎自此乃絕

勞志

沈嶠烏程人父卒廬墓六年不櫛不沐醎酸不入口哭則嘔血刺血書經年三十而卒有文集十卷

上

沈清烏程人婺州刺史大曆中李希烈陷汴州浙東西觀察使韓滉使清勸嘉興子弟四百人翼於潤州士衆發自昇山遂逆黨至汴口力戰而死詔贈衛尉少卿兼

左金吾衛將軍即發軍之地置祠以祀

勞志

高仲武評錢起詩云員外詩體格新奇理致清贍右丞
沒後員外為雄芟齊晉之浮游削梁陳之靡曼迥然特
立莫之與羣且如鳥道桂疎雨人家殘夕陽牛羊上山
小烟火隔林疎又長樂鐘聲花外盡龍池柳色雨中深
皆特出意表標雅古今又窮達戀明主耕桑亦近郊則
禮義充全忠孝兼至足可引長名流為後楷式士林語
曰前有沈宋後有錢郎

按摩詰有送錢少府歸藍田詩錢亦於歸藍田舊居
望終南別業屢形篇咏似流寓於秦至續玄怪錄謂
故華州刺史徽子方義家在華州則其後竟為秦人

矣

元
衛

錢徽字蔚章起子也歷翰林學士中書舍人加承旨拜
禮部侍郎出刺江州初州有盜劫貢船捕吏取濱江惡
少年二百人繫訊徽按其枉悉縱去數日舒州得真盜
州有牛田錢百萬刺史以給宴飲贈餉者徽曰此農耕

之備可他用哉命代貧民租入轉湖州遷工部侍郎以
吏部尚書致仕贈尚書右僕射子方義終太子賓客

新唐

書

方義嘗為侍御史見續玄怪錄

許說徵

錢徽子可復可及皆登進士第可復累官至禮部尚書
太和九年鄭注出鎮鳳翔李訓選名家中子以為賓佐
授可復檢校兵部郎中兼御史中丞充鳳翔節度使訓
敗可復為監軍使所害

舊唐書

錢珣字瑞夫，徽幼子也。善文辭，宰相王溥薦知制誥。進

中書舍人，溥得罪，珣貶撫州司馬。

新唐書

後唐崔沂初仕唐，昭宗時累遷至員外郎，知制誥。性抗厲守道，而文藻非優，嘗與同舍顏蕘、錢珣俱秉筆。見蕘珣贍速草制數十無妨，笑談而沂自愧。翌日謁相國，訴曰：「沂疎淺，不足以供詞翰之職，移為諫議大

夫。

冊府元龜

沈既濟博通羣書，史筆尤工。吏部侍郎楊炎見而稱之。

建中初召拜左拾遺史館修撰位終禮部郎

唐書

沈傳師字子言既濟子擢進士登制科乙第授中書舍
人性恬退無競時翰林未有承旨次當傳師為之固稱疾
宣召不起以本官兼史職俄兼御史中丞吏部侍郎上

沈吏部傳師性和易不從流俗不矯亢觀察三郡去
鎮無餘蓄京城居處隘陋不加一椽所辟賓僚無非
名士身沒之後家至貧苦二子繼業並致時名人以

報施不妄

唐語林
因話錄

傅師父既濟撰建中實錄十卷為時所稱傅師在史館豫修憲宗實錄未成廉察河南特詔齋一分史稿

成于理所子樞詢皆登進士第

舊唐書

沈詢咸通中檢校戶部尚書昭義節度使為政簡易性本恬和奴歸秦通詢侍者將戮之未果結牙將為亂夜

攻府第詢舉家遇害

新唐書

樞字仁偉官至丞郎人物酷似先德見北夢瑣言又唐詩紀事詢字誠之詢子舒舒子丹舒州團練教官

丹子牢李氏饒州刺史見王安石貴池主簿沈君墓表

吳興沈顏字可鑄傳師孫天復初進士為校書郎屬亂離奔湖南吳國為兵部郎知制誥翰林學士顏少有詞藻琴碁皆臻妙場中語曰下水船言為文敏速無不載也性閑淡不樂世利嘗疾文章浮靡倣古著書百篇取元次山聳叟之說附己志而名書曰聳書其自序云自孟軻以後千餘年經百千儒者咸未有聞焉天賦其極

付在鄙子其誇誕如此陳氏曰顏傳師之孫其文骯骯而自叙之語極其矜負

文獻通考

沈既濟舊志云德清人新舊兩唐書俱云吳人按王荆公貴池主簿沈君墓表云其先武康人武康族久顯至唐有既濟生傳師則既濟為吳興產昭昭矣又晁公武讀書志云吳興沈顏傳師之孫沈氏譜曰傳師自吳興徙吳德清志亦同譜說

德清志云武康當既濟時析為德清久矣德清鄉賢

祠首列傳師

孟庭玠崑山尉庭玠三子郊鄧郢

韓愈貞曜先生墓志

楊衡吳興人字中師弱冠有竒才與蜀郡符載北海王簡言隴西李元象習業青城山樓潯陽廬阜以林壑相高精綜六籍翱翔百氏為江湖間人尋擢第禮闈僑寓

荊州官大理評事

文苑英華

沈光吳興人有洞庭樂賦韋岫曰此賦乃一片宮商

此即為太白酒樓記者北夢瑣言以光為堯誤光歷

閩從事侍御史

沈亞之字下賢元和十年進士涇原李彙辟書記為秘書省正字長慶初補灤陽尉四年為福建都團練副使事徐晦後累進殿中丞御史內供奉太和三年相者宣慰德州取為判官者罷亞之貶南康尉終郢州掾亞之以文詞得名狂蹤貪冒輔者為惡故及於貶常游韓愈門李賀杜牧李商隱俱有擬沈下賢詩亦當時名輩

所稱許云

晁公武讀書志

周朴字太朴吳興人唐季避亂於福州烏石山僧寺假
犬室以居不飲酒茹葷塊然獨處諸僧辰粥卯食朴亦
攜巾盂廁諸僧下畢飯而退率以為常郡中豪貴設供
率施僧錢朴即巡行拱手各丐一錢有以三錢與者朴
止受其一了得十錢以備茶藥之費將盡復然僧徒亦
未嘗厭也性喜吟詩尤尚苦澁每遇景物搜竒抉思日
旰忘返苟得一聯一句忻然自快與僧靈觀長官薛逢
為友乾符七年黃巢陷城求得朴問曰能從我乎答曰

我尚不仕天子焉能從賊巢怒殺之湧白膏數尺後人

以為神祀烏石山詔賜廟號曰剛顯

福州府志參唐詩紀事及唐詩品彙

李昇本徐氏湖州安吉人其父為安吉令先是其家有

柑樹結一實大如斗其父異之將獻郡守有謂其父曰

此果非常所有即上獻來年見徵安知復有此物不如

勿獻其父然之因會鄰里將共食即席剖之有赤蛇在

實中剖者大驚投及於地俄而赤蛇走其母榻下尋之

了無所見未幾其母遂孕知誥

吳越
備史

陳水南臬憲嘗以南唐李昇宜繼唐後遂改馬令南唐書為唐餘紀傳此猶蕭常以三國蜀志為續後漢書也然昭烈世系甚明猶覺以銖程鑑李昇自祖父以上名稱皆當時文臣創造宋人已識及此更讀吳越脩史昇本安吉砦將潘某之子昇姓實潘也水南時特以五季篡祚短促不足繼統不若南唐聲名文物雄擅江左不愧唐後耳第溫公通鑑朱子綱目當時捉筆計必極下商榷當不俟水南為之比余見

陸游南唐書及玉壺野史南唐近事諸書所載李氏
種種陳書皆無豈水南未之見耶

姚士麟
見只編

張按一昇也而忽潘忽徐忽李何據乎

余憶徐知誥為安吉產而十年廢學竟忘其出何書
嘉平月二十五日康侯忽遣使錄此紙遺予乃知其
為錢儼筆不減真珠船也馬陸兩書都以知誥為彭
城人溫公云徐州李榮子豈南唐人為國諱務觀亦
仍其說錢氏書反為實錄耶姑存疑以俟博聞者甲

子歲斯張識

卷十

沈韜文吳興人父攸常州刺史韜文性介潔好學能屬文吳越時為元帥典謁叅軍機務有所裨益後命牧鄉郡以為湖州刺史甚有清名

一統志

金陵李氏始以唐號國錢文穆王問之曰金陵冒氏族于巨唐不亦駭人乎沈韜文曰此可取譬也且如鄉校間有姓孔氏者人則謂之孔夫子復何怪哉王

大笑賞卮酒

天中記

韜文嘗為吳越司賓使有游吳越詩曰菰米蘋花似

故鄉

遺一

不是不歸歸未得好風明月一思量武肅

憫其思鄉授以湖州刺史

古今詩話

後唐長興四年順化節度使錢元珣驕縱不法每請事於王府不獲輒上書悖慢吳越王元瓘遣牙將仰仁詮詣明州召之仁詮左右慮元珣難制勸為之備仁詮不從常服徑造廳事元珣見仁詮至股栗遂還錢唐幽於

別第仁詮湖州人也

資治通鑑

沈承禮烏程人仕錢氏歷福州節制俶歸朝徙承禮鎮
密州初秦王廷美之敗也有司按驗俶惟濬孫承祐及
陳洪進皆常有贈遺獨承禮無焉

宋史

吳興備志卷十

欽定四庫全書

吳興脩志卷十一

明 董斯張 撰

人物徵第五之四

葉參字次公國初州人業儒者寡參卓然自立咸平中
登第為舉子倡景祐中自兵部郎中出守鄉郡金部尚
書王惟正作詩送之三司度文韓琦太常丞呂公綽薛
紳秘書丞余靖曾公亮皆有詩餞其行今刻石郡庠談志
葉清臣字道卿參子也歷侍讀學士知河陽贈左諫議

大夫清臣天資夙邁遇事敢言數上疏論天下事陳九議十要五利皆當世可行者有文集一百六十卷子均

字公秉尚書司封員外郎知洪州

勞志

清臣天聖初上御崇政殿策士試雲瑞紀官賦宋郊第一清臣次之與張文定再入翰林凡六年

張按范成大吳郡志云葉參少卿嘗守吳既謝事因居焉作九檜堂以佚老然則東吳寓公自參始又按吳郡志蔣堂過葉道鄉小園詩云秀野亭連小隱堂

紅蕖綠篠媚滄浪
弁山居士無歸意
却借吳儂作醉鄉
自註云弁山居士
道卿自號觀此則
清臣本苕產信矣

陳樞字慎之長興人知泉州曾鞏薦之曰樞質性純篤治民為循吏積十有五年不上其課故為郎久不遷方朝廷抑奔競尚廉素之時宜蒙特詔有司奏樞課優進其官以獎恬退遷尚書都官員外郎誥曰吾寵樞也所以

戒奔競

曾鞏陳君墓志詳見藝文

樞為旌德令省刑薄稅為民興利以魯鞏論薦官至

尚書

南畿志

按魯鞏志樞遷尚書員外郎耳此云尚書殊悞鄧氏
函史亦仍之

劉宜翁名誼元豐間自廣東移江西皆為提舉常平官
上疏論新法勒停或云宜翁晚得道不出論新法疏大
略有云自唐租庸調法壞五代至皇朝稅賦凡五增其
數矣今又大更張不原其本斂愈重民愈因為害凡十

又言變祖宗法者陛下也承意以立法者安石也討論
潤色之者惠卿曾布章惇之徒也其語激切深至內批
云誼張皇上書公肆誕慢上惑朝廷外搖衆聽可特勒

停

曲洧舊聞
處州志

誼長興人中丙科從異人受出世法蘓軾嘗有與劉

宜翁使君書

大明一統志
蘇文忠集

胡志康字永寧父瑗嘗為湖州教授由如臯徙居烏程
志康于嘉祐三年上舍釋褐授朝奉郎杭州觀察推官

讞鞫獄情民心允服是年瑗上疏請致仕卒志康扶櫬歸
葬于邑之何山南起復以憂卒子獬解鮮登熙寧余中
榜進士通判衢州元初後遭揚總統之難散居嘉湖及
蘇州之婁江遠孫澤建家廟以祀

烏程新志

孫侂字少述吳興人父及都官員外郎侂精識元解能
得聖人深意多所論撰知制誥唐詢表其孝行賜之粟
帛累徵不赴元豐中除通直郎兄觀太常博士亦有學

行

林希孫侂傳
見宋文鑑

沈播其先武康人再世家于錢塘父玉尚書屯田郎中
知真州軍州事遂家焉播天聖二年以進士起家楚州
司法參軍再調貴池縣主簿令不能而縣大治者君之
力也嘗攝銅陵縣事有兄弟爭財者為辨其曲直卒使
之感悟讓財相與同居其去也兩縣人追送涕泣遠焉
而後去事生嚴喪死哀自族人至于婚友無所不盡其
心終身好書未嘗一日不讀而于酣樂嫚戲未嘗豫也
循道守官以不諂其上而幾至于殆者數矣故其仕常

有去志而無留心年三十六疾卒于京師子男四人皆
進士曰伯莊未仕曰季長越州司法參軍王安石妹壻
曰叔通秘書省著作佐郎曰次通試將作監主簿季長
子銖字平少從安石學進士高第歷龍圖閣待制知宣
州弟錫字子昭以王安禮任歷知海泰汝宣四州以通

議大夫致仕卒贈宣奉大夫

王荆公曾南豐兩
集參宋史維揚志

陳舜俞字令舉烏程人博學強記舉進士又舉制科第
一熙寧中以屯田郎中知山陰縣詔俟代還試館職舜

俞辭青苗法行舜俞不奉法上疏自劾謫監南康軍鹽酒稅五年而卒舜俞始嘗棄官歸居秀之白牛村自號白牛居士已而復出遂貶死蘇軾為文哭之稱其學術才能無百人之器慨然將以身任天下之事而人之所以周旋委曲輔成其天者不至一斤不復士大夫識與不識皆深悲之云

舜俞以言新法謫居南康騎牛遊廬山詩畫皆傳于世舜俞初從安定胡先生學熙寧中六客其一也其

墓在城南之蘇灣子孫猶宅于烏鎮

文獻通考

舜俞通判壽州見中都志

張先字子野能詩詞以秘書歷知虢州渝州

見梅舜俞集

吳江有如歸亭康定元年知縣事秘書張先始為大

之

吳郡志

張先元豐中判秀州先有俊才尤工詩

嘉興志

先子文剛字常勝王安石妹婿也安石嘗志其墓

詳字

故藝

文

劉述字孝叔第進士累官提點江西刑獄六年不奏考
功課改荆湖等路轉運使再遷刑部郎中神宗立召為
侍御史知雜事又十一年不奏課帝知其久次授吏部
郎中王安石爭謀殺刑名述無判刑部駁之及勅下述
封還中書執奏不已安石白帝詔開封府推官王克臣
劾述罪于是述又率御史劉錡錢顛共上疏曰安石執
政未數日中外人情囂然胥動蓋以專肆胸臆輕易憲
度無忌憚之心故也安石自應舉歷官事尚堯舜之道

以倡率學者及遭時得君首議財利務為容悅言行乖戾一至于此剛狠自任則又甚焉豈宜處之廟堂以亂國紀願早罷逐以慰天下元元之心曾公亮陰自結援以固寵趙抃括囊拱手但務依違大臣事君豈當如是疏上王安石奏先貶錡監處州益酒務顛監衢州益稅開封府獄具述三問不承安石欲置之獄司馬光與范純仁爭之乃議貶為通判帝不許以知江州遷温州述以五事訓人曰孝義務學謹身勤力蓄積民咸化之

江浙

通志

莫君陳字和中從安定先生學熙寧中新置六法科首
中其選甚為王安石器重御家嚴整如官府然東坡有
西湖跳珠軒詩贈莫同年即君陳也長子砥字彥平知
識疏通嘗知永嘉生徒稍衆而養士額少公為增額士
感之為立生祠子伯虛字致遠為郎繼守温州立思齊
堂以記其事後知常州和氣所召春有瑞梅甘露夏麥
秀兩岐秋禾合穎皆瑞應也後退居里社注意佛書撰

修行淨土書法門華嚴經意並行于世又解釋楞嚴圓

覺經意藏于家諸孫濛漳

談志孫觀
梅露堂記

伯虛嘗令崑山

見蘇州志

楊萬里淳熙薦士錄薦莫漳云長于史學達于吏事

楊誠齋集

隆興元年永嘉飢莫守伯虛鏤榜遠播飢荒之聲致

客艘四集米價大賤

温州府志

莫鎔字彥輔君陳第二子有子曰伯鎔字器之少有高

世志年五十即歸林以迎師教子為事子三人曰濟曰
汲曰沖皆有峻聲擢進士第時號三莫後濟沖又中博
學宏詞科礮又有孫曰澄庚辰進士亦知名于時

談志

仰仁謙吳興人太平興國間以太子舍人知永嘉縣廉
慎有容撫民如子時錢氏方歸疆土仁謙始為邑令政

事一新後卒于官子孫回家焉三世孫忻

温州府志

仰忻字天貺力學篤行年五十餘執母喪盡禮躬自負
土廬于墓側有慈烏白竹之瑞元祐間郡守邴亶疏于

朝乞加旌獎紹聖間郡守楊磻表其里曰孝廉大觀二
年八行取士郡以忻應詔未幾卒特贈將仕郎子師常
師尹皆業儒有聲嘗有富室欲通婚忻著同姓圖拒之
姬周鄭江與仰同姓後世論氏不及姓非也有訓童規
鑑永嘉百題詩集

劉燾字無言諠次子東坡知元祐三年舉讀其文曰必
巖谷間苦學者中第三廷對又中甲科尤善書嘗被詔

脩閣帖十卷

談志

姚舜仁字令由歸安人元豐八年登第為太學正召對稱旨除館職遷庫部員外郎進明堂定制圖并序上賜對褒獎降詔可其奏又撰明堂訓解一卷擬上之而疾後兄舜咨表進以成其志

談志

朱承逸嘗人積善好施慶歷庚寅歲以米八百石作粥散貧是歲生孫名服熙寧中金榜第二人仕至中書舍人服子或次孫肱亦登第著名節遂為吾鄉名族焉天之報善昭昭也如此

癸辛雜志
參說郭

承逸代人償債事見掌故不重錄承逸子臨亦進士
肱字亦中

朱臨字正夫年未四十以大理寺丞致仕居吳興作仰
高亭于城上服肱其子也

稗海

朱服字行中歷監察御史裏行紹聖初詆變法召為中
書舍人拜禮部侍郎湖州守馬城言其居喪疏几筵而
處他室謫知萊州又坐與蘇軾游貶海州團練副使蘄

州安置

宋史

服子或字無惑著萍洲可談

朱服烏程人哲宗時知廬州歲飢便宜賑給全活十餘萬口明年大疫又課醫持藥分拯之賴以安者甚

衆徽宗即位召為集賢殿脩撰再知廬州

廬州府志

姚孝孫字光祖安吉人官司農主簿

安吉州志姚祐父也

姚祐字伯受長興人徽宗初除夔州路轉運判官且行會帝幸禁苑御弓矢祐奏聖武臨射賦帝大悅留為右正言歷陳紹述之說遷左司諫建議置輔郡以拱畿

歷延康殿學士禮部尚書贈特進謚文僖

宋史

余拂君厚雪川人也其居在漢銅官廟後溪山環合有相宅者言此地當出大魁君厚之父朝奉君云與其善之于一家不若推之于一郡即遷其居于後以其前地為烏程縣學不二三年君厚為南宮魁而莫儔賈安宅繼

魁天下

春渚紀聞

蔡京書元祐黨人碑三百九人歸安沈千與焉

見宋史帝紀

何椒丘集千元豐二年進士郡志悞作于

元衢

余汝尚字退翁烏程人登第涉歷州縣無營進心還家苦貧未能忘祿養又從趙抃于青州以屯田郎中致仕

卒孫俟敷文閣直學士

宋史新編

賈收號耘老仁宗朝梅摯公儀出守杭州上賜之詩有曰地有吳山美東南第一州梅以上詩語名堂士大夫留題甚衆東坡倅杭因命筆吏盡錄之而未著其姓名默定詩之高下遂以耘老詩為冠

庚溪詩話

賈安宅字居仁收之從孫年十八入太學升上舍二十

二廷試魁天下召對除校書郎累遷至戶部侍郎無太
上皇帝潛郎贊讀建炎中以舊學為給事中封駁無所
回避歷事三朝累司文柄其所選掄皆得成材徽宗嘗
手詔獎諭之子選詳明掌故通達法理為刑部侍郎

談志

今志載而不詳

鄭居中去位侍御史張樸言朋黨分攻非朝廷福若
不揃其尤久則難圖于是宇文黃中賈安宅等六人
皆罷凡蔡京所惡亦指為居中黨而逐

宋史

衢按安宅除中書舍人制云西臺本政事之地內史
掌誥命之文見職略紹興二年以給事中除工部侍
郎見朝野雜記選為福建安撫使于淳熙十四年新
靈澤廟奏改會應見八閩通志

盧革字仲辛湖州人少舉童子知杭州馬亮見革詩異
之秋貢士密戒主司勿遺革革聞語人曰以私得薦吾
恥之去勿就後二年遂首選年十六

宋史

盧秉字中甫革子也未冠有雋譽嘗謁蔣堂坐池亭堂

曰亭沼粗適恨林木未就耳秉曰亭沼如爵位時來或有之林木非培植根株勿成大似士大夫立名節也堂賞味其言中進士甲科浮沉州縣二十年人無知者王安石得其壁間詩累擢提點兩浙刑獄領鹽事持法苛嚴歷集賢殿脩撰知渭州西討有功進龍圖閣直學士秉守邊久以父老乞歸移知湖州未至復詔還渭元祐中知荆南劉安世論其行益法虐民降秩奉祠

宋史

葉少蘊崇觀間驟貴顯三十一歲掌外制次年遂入翰

林中廢至建炎乃執政然才數日而罷平生所歷州鎮皆有能聲胡文定安國嘗以其蔡穎南京之政薦于朝謂不當以宿累廢晚節兩帥金陵當烏珠臨江移三山平羣寇其功不可沒也秦檜秉政欲令帥蜀辭不行忤

檜意以崇慶節度使致仕

文獻通考

蔡京初以童貫為陝西宣撫取青唐公聞見京問之曰貫以八寶恩除節度已非祖宗法今又以執政之任付之青唐朝廷所欲得也使成功則何以處之

京有媿色既得青唐公又見京問何以賞貫沉思未
荅公曰節度使上惟有開府儀同三司不識朝廷遂
與之否京曰恐未至是公曰幸甚外人以為必進此
官矣某憂不能寐幸不至此則已設或有之今日言
與他日言其受禍一也何遲速之間

宋名臣
言行錄

崇寧初蔡太師持紹述之說為相既悉取元祐廷臣
及元符末上書論新法之人指為謗訕而投竄之又
籍其名氏刻之于石謂之黨籍碑且將世世錮其子

孫其後再相亦自知其太甚而未有以為說葉左丞
為祠部郎從容謂之曰夢得聞天下有道則庶人不
議今舉籍上書之人名氏刻之于石以昭示來世恐
非所以彰先帝之盛德也蔡大感悟其後黨禁稍弛
而碑竟仆焉胡尚書直儒聞之嘆曰此人宜在君側

却掃
編

石林為蔡京客故避暑錄所書政宣間事尊京曰魯
公凡及蔡氏每委曲回護而于元祐斥司馬溫公名

何也建炎紹興初仕宦者供家狀有不係蔡京王黼等親黨一項今日江湖從學者人人諱道是門生石林其矯一時之弊耶

清波雜著

烏程派夢得七世祖彪生刑部侍郎達事吳越刑部夫人永安郡太君羊氏葬湖州葉氏始自縉雲遷湖州而居烏程者以烏程縣雲川鄉中書省為定著

水東

日記

少蘊子棟柱模見石林燕語柱為永州太守子節為

宜興丞見周平園乾道丁亥泛舟游山錄

劉士英字仲發武康人靖康初通判太原府金人圍城
被執旋被害旌其廟曰忠烈妻陳氏居父母家亦被擄

獲赴井死

姑蘇志郡志載仲發不及
妻故脩載陳氏蘇人

沈畸字德侔德清人崇寧中擢監察御史六察無言事
法畸詣匭上十事言花石擾民土木弊國冗費多恩澤
濫議論異同下情睽隔其論當十夾錫錢最為剴當
進殿中侍御史建炎初贈龍圖閣直學士子濬為右正

言宋史

完顏宗弼攻臨安錢塘令朱蹕率民兵邀敵款拒使抗
民得為逃死計行二十里敵逆戰中傷猶叱左右負已

再戰

西湖志

蹕字子美吳興人朱大廉蹕長子右迪功郎

朱孝廉蹕次子右修職郎

安吉志

沈昭遠字傳耀歸安人政和八年以上舍擢第紹興十
三年累官中書舍人擢戶部侍郎朝請大夫知袁州舊
試貢士皆寄僧舍昭遠始創貢院民輸義倉米倉吏遺

法倍斂力為減其半時四邑羨餘錢米上邑不下數十萬昭遠曰此非天降非地出無非虐取于民盡却之民皆感悅十六年擢敷文閣待制知洪州

一統志江西通志

紹興十二年九月昭遠使金賀生辰

宋通鑑

盧知原字行之德清人以父任至梓州路轉運副使王黼當國費出無藝知原因疏言之黼怒罷去久之起提點東京刑獄陞秘閣脩撰提舉河北高宗即位知温州帝東幸知原由海道轉粟及金繒十萬至台州獎擢右

文殿脩撰管內安撫使凡四年民繪像祠之歷徽猷閣待制知臨安府諫官唐輝論其乖謬以舊職奉祠弟法

原

宋史

知原秉子也

見談志

盧法原字立之積官吏部尚書紹興元年知夔州尋進
端明殿學士川陝宣撫副使金人攻關輔叛將史斌陷
興州法原初堅壁不戰既而河東經制使王燮以乏食
班師法原開關納之與燮同破斌復興州方巨盜充斥

秦隴叛兵欲窺蜀法原極意拊循嚴為脩禦傳檄諸路
人心稍安視山川險阻分地置將關師古屯通州劉錡
屯巴西前後屢捷上所倚重會烏珠攻關為吳玠所敗
法原素與玠不睦玠因奏功訟法原之過帝手詔詰問
法原辯甚力上頗不直之憂恚卒始法原之擢宣撫也
上從容謂知原曰朕方以川陝付法原盖兄弟皆以材

見稱于世云

宋史

衢按臨海縣志紹興中知原來寓墓在署東一百二

十里嘗夢人告云生山東死柑桐後果葬焉赤城舊志遂云山東人悞子連見睽車志曾孫子章字元平嘉泰二年進士見赤城舊志

盧球草之孫嘉祐八年通判宣州

寧國府志
嘉疑作元

盧彥仁秉之孫

吳中
舊事

劉珏字希范遷吏部侍郎同脩國史言淮甸脩敵兵食為先乃今以降卒為見兵以糴米為見糧無一可恃維揚城池未脩軍旅多闕卒有不虞何以待之已而金人

果乘虛大入帝急如臨安府以珏為龍圖直學士知宣
州隆祐太后奉神主如江西詔珏為端明殿學士權同
知三省樞密院事從行至洪州疏言脩治巡幸道路之
後乞降詔悉罷金人攻吉州分兵追太后舟至太和縣
衛兵皆潰珏奉太后退保虔州言者論不已連謫秘書
少監貶衡州紹興初以朝散大夫分司西京追封龍圖

閣學士

宋史

李剛罷中書舍人劉珏行詞謂剛勇于報國數至敗

衎坐貶

胡安國傳

成無玷字士慤少有才氣善文崇寧四年夏趙懷德舉

國劾順無玷撰端門受降頌以獻之徽宗覽而褒之明

年賜進士及第調江西令

勞志

紹興二十四年十一月丁卯施鉅自吏部侍郎除參知

政事二十五年四月乙酉施鉅罷提舉太平興國宮

宋史

鉅字大任安吉人

自檜獨相至死之日易執政二十八人皆世無一譽

柔佞易制者如孫近韓肖胄施鉅鄭仲熊之徒率拔之冗散遽躋政地然甫入即出或一閱月或半年即

罷去

宋史

陶旒字季成吳興人父彖進士起家卒官承議郎通判鄂州君少孤力學元符三年進士乙科歷知東陽縣有善政邑人畫像祀之君不以希世為心臨事明敏毅然敢為所居可紀他人莫及也

汪藻陶君墓表

沈與求字必先德清人累遷殿中侍御史論范宗尹年

少為相恐悞國事紹興四年為浙西路安撫使復以吏部尚書召除參知政事金人將入侵上諭輔臣曰朕當親總六軍與求贊之上書車攻詩以賜上曰朕以二聖在遠屈已通和今豫逆亂如此安可復忍與求曰和親乃金人屢試之策不足信也因奏諸將分屯江岸而敵人往來淮甸當遣岳飛自上流取間道乘虛擊之彼必有反顧之憂五年兼權知樞密院事六年張浚出視師不告同列與求嘆曰大事不與聞何以居位遂丐祠罷

出知明州謚忠敏

宋史

俞侯字居易汝尚孫宣和中知真定獲鹿縣辟為歸安縣令縣在郡邦人多難之乃預定規模處之以公葛勝仲知州事待侯甚厚或至治與之談所至有治聲累遷

敷文閣學士

西吳里語

俞汝尚孫侯曾孫南仲俱早年丐休告命有流傳父

子當世榮之四世納祿抑又過焉之語

談志

沈時升字維中雪川人宣和末來令慈谿誠心撫字愛

民如子俗咸化之無敢梗政既去父老請立祠于治內

名沈公堂其子該為丞相

寧波府志

調字宜衍該字約父俱時升子

待制沈調宣和間為越州士曹掾方臘亂太守劉韜募民能得賊首一級賞錢二萬調聞之遽見請以為如是則小人規利或殺平人乞令必生擒乃給賞仍倍其數不閱日郡人俘數十輩以獻命調覈其寔其間附賊者纔三四人乃請盡釋其餘韜從之自後凡有稱得賊者

悉付調辦驗全活殆數千人

紹興二十五年十二月甲午沈該自敷文閣待制知夔州除參知政事二十六年五月壬寅沈該自參知政事除左僕射同平章事二十九年六月己酉沈該以觀文

殿大學士提舉洞霄宮尋奪職間住

宋史

孫道夫侍講奏敵有窺江淮意上曰朝廷待之甚厚彼以何名為兵端道夫曰彼身弑其父兄而奪其位興兵豈問有名宰相沈該不以為慮道夫每進對輒

言武事該疑其引用張浚忌之遂請外知綿州致仕

宋史

周操字元持登紹興乙卯第知徽州黟縣以忤權要去職後除國子錄當輪對上意欲興武學以問操操歷以本朝建制之因對遂無武學博士後歷言路陞八座及為詹事東宮加禮敬焉有奏議二百卷藏于家操歷尚

書吏部員外郎

歸安志

操嘗以徽猷閣直學士知太平州見陸游入蜀記以

左朝散郎充秘閣脩撰知衢州

見衢
州志

隆興元年敵移書取海泗唐鄧且邀歲幣左正言鄭丙持不可俄以王之鑒龍大淵往議丙與侍御史周操復言四郡固不當議若歸陵寢乃予歲幣聘使未

應出境上命罷使

周必大鄭
丙神道碑

施元之字德初長興人左宣教郎衢州刺史于郡立

闕

風亭及起覽堂洪邁毛幵為記

衢州
府志

元之任贛州太守見劉後村杜郎中贛志

施宿字武子長興人慶元初知餘姚縣其為政務大體
興廢舉墜不爭細謹尤加意風教市田置書教誨學者
姚北瀕海歲役民脩堤民甚苦之宿更築石堤建莊田
二千畝以備修堤之役與前令謝景初同稱

浙江通志
兩浙名賢

錄

施宿晚為淮東倉曹時有故舊在言路因書以遺番
荀歸院相會出以薦酒有問知所自憾其不已致也
劾之無以數罪宿嘗以其父元之所注坡詩刻之倉

司有所識傳樺字漢孺湖州人窮乏相投善歐書遂
俾書之鋟板以賙其歸因撫此事坐以贍私其女適

章農卿良朋云

癸辛
雜志

周淙字彥廣長興人父需字仲達以進士起家廣東運
判知太平州淙警敏力學以父任為郎紹興末知濠梁
淮楚舊並有山水置砦自衛者淙為立約束結保伍金
主亮傾國犯邊民賴全活者不可勝計孝宗受禪王師
進取虹縣中原之民翕然來歸扶老攜幼相屬於道淙

計口給食行者攜以牛酒居者處以室廬人人感悅張
浚視師駐于都梁謂淙曰有急公當與死淙亦感激至
謂頭可斷身不可去浚入朝悉陳其狀上嘉嘆不已進
直徽猷閣帥淮揚時兩淮經蹂踐民多流亡淙極力招
輯安堵如故未幾知臨安府請禁貴近奢靡浚河流以
通舟楫進右文殿脩撰奉祠歸

宋史 臧衍
長興志

衢按談志進士表需元豐五年進士至紹興末八十
餘年矣不知其壽若何淙晚年生者耶

李彥穎字秀叔德清人金入浙西父扶家人逃避彥穎
方十歲追不及敵已迫其後能趨仄徑亂流獲濟調富
陽丞御史周操薦為御史臺主簿金敗盟張浚督師進
討孝宗方向浚執政堅主和陳良翰周操不以為然右
正言尹穡陰附執政薦引同己者轉言和于上前上惑
之罷督府良翰操相繼黜而穡進遣諫議大夫一日穡
以和戰守叩彥穎荅曰人所見固不同公既以和議為
是曷不明陳于上前以身任之事成功歸于公不成奉

身而退若欲享其利而不及其害國事將誰倚穡大怒自是銜彥穎陰排之改國子博士權吏部郎中歷升詹事兼吏部侍郎權尚書兼侍讀時廷臣多以中批斥去彥穎言臣下有過宜顯逐之使中外知獲罪之由以為戒今譖毀潛行斥命中下將陰邪得伸善類喪氣非盛世事也除吏部尚書既而自簽書樞密擢參知政事陞馬在告力求去以資政殿學士知紹興府勤約有惠政與祠復參知政事謚忠文子沐慶元中為右正言排趙

汝愚公論醜之

宋史

孝宗命選諫官虞允文以李彥穎林光朝王質對

宋史

劉一止字行簡歸安人七歲能屬文有司欲舉八行曰
行者士之常不就登進士第紹興初試館職其略曰事
不克濟者患在不為不患其難聖人不畏多難以因難
而圖事耳如其不為俟天命自回人事自正敵國自屈
盜賊自息有是哉高宗稱善除秘書省兩浙類試以科
舉方變欲得通時務者同列皆患其無人一止出一卷

曰是宜為者乃張九成也衆皆服遷監察御史上疏謂天下之治衆君子成之而不足一小人敗之而有餘君子雖衆其道孤小人雖寡勢易蔓不加察則小人伺隙而入以敗政矣秦檜請置脩政局一止言周宣王內脩政事脩其外攘之策而已今之所脩特簿書獄訟遷降營繕之務未見其所當急也又請倣劉晏法瀕江置司以制國用鄉村置義倉以備水旱浚多採用其言遷起居郎奏事帝迎語曰朕親擢也由六察遷二史祖宗時

有幾一止謝先朝惟張徵李稅耳因極陳堂吏宦官之
蠹執政植私黨無憂國心翌日罷奉祠歷擢中書舍人
無侍讀莫將賜出身除起居郎一止論將以助和議驟
綴從班臣恥與同命乞并罷不報遷給事中居鎖闥百
餘日繳奏不已用事者始忌奏其迎合李光復罷奉祠
秦檜死召至國門以病不及拜力辭年八十三一止冲
淡寡欲嘗誨其子曰吾平生通塞聽于自然惟機械不
生故方寸自有樂地博學無不通為文不事纖刻制誥

坦明有體其草顏魯公孫特命官制甚偉帝嘆賞為手
書之詩自成家呂本中陳與義讀之曰語不自人間來
也有類稿五十卷子巒螯弟寧止

宋史

紹興九年有詔侍從兩省薦西北人材御史周葵同

給事中劉一止薦呂廣問參政李光客也

周必大簡
惠公神道

碑

寧止字無虞登進士甲科歷兩浙轉運判官苗劉之變
寧止馳詣呂頤浩劉光世勉以忠義退而具軍須以助

勤王高宗復辟累遷吏部侍郎進徽猷閣直學士寧止
有文名慷慨喜論事指切時政多人所難言乞禁王安
石日錄復賢良方正科用司馬光十科取士法倣唐宰
執論事以諫官侍立皆其顯者寧止與一止岑皆羣從
昆弟帝嘗稱寧止忠一止清岑敏云

范成大與寧止初赴廷試京師人已傳惟襄陽一范
吳興一劉直言暨臚傳盡甲科不見二公姓名李丞
相士美以考官侍立出班奏知徽宗亟令索此二卷

進讀嘉嘆再三遂俱寘第二甲首

樓攻媿集

劉度字汝一博覽強記內翰汪藻奉祠領日厯寓居西

寺一見異之以制科表薦

談志

度脩潔博習業夢得汪藻皆以賢良方正薦旋第進士入為學官館職孝宗即位擢諫議大夫前後上九十餘疏其子瑞金宰深知裒成上下卷周必大為之

序

平園續稿深知郡志作深之

劉崧字伯高嶠字仲高岑字季高吳興人也東坡先生

所賦吳興文人之詩劉孝叔諸孫也三公才學官位士
夫例能稱之汪彥章嘗銘仲高之墓仲高任福建提刑
日書武夷山三大字甚奇今石刻尚存

合璧
事類

劉岑遷溧陽博學愛士有古君子風先世居烏程之
杼山曾祖述為御史忤荆公出知江州司馬溫公折
簡與孝叔有道勝名立之語岑遂以道勝名其堂

溧陽

縣志

季高三子右通直郎淪右脩職郎治司屬官泌

周平
園

舟遊
山錄

紹興以來文散階皆左右字以別有無出身惟嘗犯
賍者則去之劉岑季高得罪秦氏坐賍廢後復去其

左字季高署銜不以為媿也

齊東野語

紹興二十五年秦檜死復張浚趙汾劉岑等官

宋史

芮擘字國器官左從政郎仁和縣尉嘗和沈長卿牡丹
詩云寧令漢社稷變作莽乾坤秦檜惡之坐竄化州檜
死始召用為廣東提刑以文章飭吏事雍容儒雅人推

重之

參廣東通志宋史
新編堯山堂外紀

葉顥進尚書左僕射首薦王十朋周操芮擘等可備

執政侍從臺諫

宋史

秦檜久專朝政而士大夫急于進者多附檜意掎摭人之語以為謗訕通判常州沈長卿嘗與參知政事

李光啟曰縉紳守和親甘出妾敬之下策要荒難結信孰慮吐蕃之劫盟檜時已惡之紹興二十五年六月與左從政郎芮擘同賦牡丹詩為隣舍人所告以

為譏議送大理寺獄具檜奏其事簽書樞密院權參知政事鄭仲熊嘿無一言罷朝檜頗咎之時有旨長卿曄皆除名編管于是侍御史董德元右正言王珉論仲熊遂罷為提舉太平興國宮

宰輔編年錄

芮國器每對人說話退必入室默思

呂東萊集

曄子正言卽武太守及言上高宰

見周必大芮氏家藏集序

芮輝字國瑞乾道中提舉浙西常平除江西運判

吳郡志南

昌府志

芮國瑞為桐川簿過倪偁曰與我遊者皆有歌詩然
珠玉之賜不如藥石之贈公曰建平吏黠民奸子何
以處之曰以嚴馭吏以恕待民奉公以勤律身以儉
交同寮以誠暇日讀吾所未見書以增其所未至公

善之

氏族
大全

吳興莫汲字子及解試省試廷對皆居前列一時名聲
藉重後為學官以語言獲罪南遷石龍地並海子及素
負邁往之氣暇日具大舟招一時賓友之豪泛海以自

快將至北洋海之尤大處也舟人畏不敢進子及大怒脅之以劍不得已從之及至其處四顧無際湏臾風起浪湧舟掀簸如桔槔見三魚皆長十丈餘浮弄日光其一若大鮎狀其二狀類尤異衆皆戰栗不能出語子及命大白連酌賦詩數絕略無忌意興盡乃返其一絕云
一帆點破碧落畧八面展開虛無天柁樓長嘯海波湧

今夕何夕吾其仙

齊東野語

衢按宰輔編年錄前知衢州趙令衿居衢州因觀秦

檜家廟記口誦君子之澤五世而斬之句通判汪台
錫教授莫汲于坐間聞之因告令衿謗訕既而詔謫
令衿于汀州且置獄檜死上謂參知政事魏良臣等
曰趙令衿趙汾被罪事起汪台錫莫汲卿等可即治
之執政奏莫汲張常先陸升等八人以告訐濫叨官
爵上曰此大害風教悉送遠郡編管乃粵東志謂汲
為國子監正檜惡其主張善類謫化州謬矣

莫濛字子蒙歸安人提舉廣南市舶張子華以賍敗朝

廷命濛往鞠之濛正其罪又言秦熺鄭時中受子華賂計直數十緡還朝除大理寺正吏部火連坐者數百人久不決命濛治之濛察最可疑者留于獄出餘人為耳目以踪跡之約三日復來遂得其實繫者乃得釋

宋史

莫濛紹興中知揚州城北命濛增築規度城闔分授諸將各刻姓名甃堞間懸重賞激勸閱數月告成

統

志

莫濟溫粹和易而立朝鯁亮毅然不可移為給舍封駁

有常知温州以儒雅銜吏事為明州長吏輔以正道後

知泉州所至皆稱循良

談志

陳居仁嘗言臺閣宜多用明習典故之人帝問其人

以李燾莫濟對

宋史

從官梁克家莫濟俱求補外陳俊卿奏二人皆賢其

去可惜

上

濟字子齊嘗為會稽教授

紹興志

沈夏字得之德清人紹興中為太常主簿賜對便殿論

古昔公卿身兼將相南巢之舉尹實視師東山之征周公專之漢之諸葛晉之杜預唐之李靖類皆儒者之傑出乃今士大夫口不談兵緩急孰可任用上悅除宗正丞淳熙中遷工部侍郎歷同知樞密院事時大臣專政夏凝然中立每公會一揖之外無他言有所論議不為

少貶諡簡肅

浙江通志

沈樞字持要歷吏部侍郎封安吉縣開國男諡獻敏

安吉

州志

沈詹事持要坐葉丞相論恢復貶筠州沈方售一妾
年十七八攜與俱行處筠凡七年既歸呼妾父母以
女歸之猶處子時人以比張忠定公詠會稽潘方仲
為安吉尉獻詩云昔年單騎向筠州覓得歌姬共遠
游去日正宜供夜直歸來渾未識春愁禪人尚有香
囊愧道士猶懷炭婦羞鐵石心腸延壽藥不風流處

却風流

龐元璣
談叢

李泱字無善彥穎中子也以父蔭提舉浙東常平會稽

督零稅急械繫滿府縣值公攝帥盡釋之士民歌呼義
手至額曰真李參政兒也以兵部郎召遷太府少卿建
言忤韓侂胄出福建運判子仁本知南陵縣仁及知仁

和縣仁表迪功郎仁元通仕郎

葉水心李公墓志詳藝文

沈作賓字賓王以父任登仕歷知台州五十日盡除前
政之弊邦人胥悅前守嫉其勝已也日媒孽之罷去慶
元初帥浙東韓侂胄方用事族有居越者私釀公行作
賓逮捕寘于獄竄其奴除兩浙轉運副使入奏攢宮一

司歲撥經控制錢為緡率四萬有奇未見弊壞輒皆脩造妄費固不足計亦非所以安神靈彰聖孝自今有以營繕聞于朝下守臣稽覈畫旨而後興役上首肯再三而脩奉者不樂也遷權工部侍郎兼戶部歷江西安撫使兼知隆興府在郡搏錢二千餘萬緡僚屬請獻之朝作賓謂平生未嘗獻羨一半歸帥司犒師半隸本府進

顯謨閣學士致仕贈金紫光祿大夫

宋史

劉唐稽字林宗樞密珏子能嗣家學治室曰養浩齋翰

林學士汪彥章薦之朝又為記歷知常州

孫仲益
鴻慶集

曹清烏程人父嘗殺人繫獄清自誣手刃代刑其尸邇
流至家葬西陽村邑人廟祀有祈輒應

魯雪之烏程人寶祐間雪之父獲罪當刑代死吏上其

事遂為立廟

西吳
里語

丁勝烏程人善騎射嘉平十五年以卒伍從淮東安撫
制置司許國鎮襄陽國之出脩李全也時李全陽為國
下見必拜國喜曰吾折伏此人矣勝曰全猾人也終不

能為相公下願深脩之寶慶元年正月全叛國走死統制彭興及親兵趙社朱虎皆降惟勝與張世雄不屈提親兵與賊巷戰斬賊將馬良勝之揚州歸趙范范授勝副統制紹定三年七月詔削全官爵命趙范趙葵率兵討之四年正月勝與范葵敗全兵于新塘全敗死授淮

揚節度使留守揚州贈太尉

烏青志

丁勝起自羣盜以功為福州觀察使大將軍嘉熙間以老乞內任朝廷授以浙西總管嘗駐兵平江守史

宅之每侮之勝曰丁勝是作賊後來作官尚書作官了却未作賊宅之自是不敢復為戲慢淳祐初馬光祖為畿憲會都內有巨寇許大四聚衆州縣大擾而憲司議遣勝勦捕勝力辭行光祖謂其畏怯勝曰昔光武見大敵勇見小敵怯今賊勢巨測而先遣總管萬一不利後使何人光祖始服

杭州府志

吳興備志卷十一